

CBETA電子佛典集成

CBETA Chinese Electronic Tripitaka Collection
ebook

T17n0807

佛說內藏百寶經

後漢 支婁迦讖譯

中華電子佛典協會



目次

- [編輯說明](#)
- [章節目次](#)
- [卷目次](#)
 - .001.
- [贊助資訊](#)

編輯說明

- 本電子書以「CBETA 電子佛典集成 Version 2022.Q1」為資料來源。
- 漢字呈現以 Uni code 3.0 為基礎，不在此範圍的字則採用組字式表達。
- 梵文悉曇字及蘭札字均採用羅馬轉寫字，如無轉寫字則提供字型圖檔。
- CBETA 對底本所做的修訂用字以紅色字元表示。
- 若有發現任何問題，歡迎來函 service@cbeta.org 回報。
- 版權所有，歡迎自由流通，但禁止營利使用。

佛說內藏百寶經

後漢月氏三藏支婁迦讖譯

佛在羅閱祇耆闍崛山中。時有萬二千比丘僧、菩薩七萬二千人共坐。

文殊師利菩薩從坐起，前白佛：「今菩薩大會，欲從佛聞漚和拘舍羅所入事。菩薩何因緣分別知內外事？」

佛語文殊師利菩薩：「聽我所說，隨世間習俗而入教，佛智不可量、經法不計，諸阿羅漢辟、支佛所不能知，何況世間人當所聞知？世間人所行皆著，佛所行無所著，獨佛能相知，如佛經法所言，如佛身內外心智慧。

「佛何緣現世間？何因當別知？雖在世間皆不著，悉為世間作明。身所行、口所言、心所念，隨世間習俗而入，行內事、行諸佛法，所行無能過者，佛所行無有能逮者，隨世間習俗而入，無有能知者。

「佛用哀十方人故悉現明，隨世間所喜為說經法。

「菩薩不從父母遘精而生，其身化作，譬如幻示現父母，隨世間習俗而入，示現如是。

「佛光焰不可計，照明十方，隨世間習俗而入，示現七尺光明。

「佛未嘗持足蹈地，文相反現地，隨世間習俗而入，示現如是。

「佛從數千萬億阿僧祇劫以來，成就般若波羅蜜，隨世間習俗而入，示現小兒。

「佛照明十方人於姪瞋中，隨世間習俗而入，亦復現妻子。

「菩薩生墮地時，自說言：『天上天下無過我者，我當過度十方人。』隨世間習俗而入，亦復問太子，閻浮提坐樹下時。從是起去勤苦六年，隨世間習俗而入，示現人勤苦如是。

「佛道欲成時，於樹下獨坐，隨世間習俗而入，放光使魔知之。

「佛智慧以成，悉等無有能過者，隨世間習俗而入，得佛坐安隱，示現世間如是。

「雖得佛，用哀十方人故，當為說經度脫之。釋梵從佛求哀，為人故使佛說經，隨世間習俗而入，示現如是。

「佛智慧無有能增減者，隨世間習俗而入，示現智慧多少如是。

「佛亦無所從來，去亦無所至，住如本無，隨世間習俗而入，呼佛為出入，示現如是。

「佛無入所適住，譬如空亦無所適住，隨世間習俗而入，呼佛為住，示現如是。

「佛足譬如蓮花，不受塵垢，佛洗足，隨世間習俗而入，示現如是。

「佛身如金不受塵垢，佛現入浴，隨世間習俗而入，示現如是。

「佛口中本淨潔，譬如鬱金之香，佛反以楊枝漱口，隨世間習俗而入，示現如是。

「佛未嘗有飢時，用哀十方人故，為現飢，隨世間習俗而入，示現如是。

「佛身如金剛，淨潔無瑕穢、無清便，現人大小清便，隨世間習俗而入，示現如是。

「佛身無有衰老時，但有眾德，而現身衰老，隨世間習俗而入，示現如是。

「佛身未嘗有病，而現病呼醫服藥，與藥者得福無量，隨世間習俗而入，示現如是。

「佛力不可當，持一指動十方佛刹，現人羸瘦疲極，隨世間習俗而入，示現如是。

「佛一念頃能飛至無央數佛刹，而現疲極，隨世間習俗而入，示現如是。

「佛身如幻，以經法名為身，現人惡露身，隨世間習俗而入，示現如是。

「佛本無所有，隨世間所喜樂現所有，隨世間習俗而入，示現如是。

「佛身力不可計，終無坐起、行步、臥出，現人坐起、行步、臥出，隨世間習俗而入，示現如是。

「佛身終不以寒溫動，隨得寒溫陰涼，隨世間習俗而入，示現如是。

「佛如空，現人常著衣無有解時，譬如梵天人常著衣，隨世間習俗而入，示現如是。

「佛頭未嘗墮髮，法但示人，亦無有見持剃刀去者，隨世間習俗而入，示現如是。

「佛無坐時，現人勤苦於石上坐，隨世間習俗而入，示現如是。

「佛咽喉有滋味之相，未嘗有飢時，用哀十方人故，有人施與麁惡悉為受，隨世間習俗而入，示現如是。

「佛功德之福不可盡，亦無有能過者，佛入城分衛得空鉢出，隨世間習俗而入，示現如是。

「佛功德福不可盡，欲得天上天下名好衣，悉可得，故著補納之衣，隨世間習俗而入，示現如是。

「佛欲得舍宅、床、臥具、天上天下珍寶、殿舍，悉可得，現世間人，暴露精思草蓐上坐，隨世間習俗而入，示現如是。

「佛持威神，吹海水悉令枯竭，見天雨持傘蓋，隨世間習俗而入，示現如是。

「佛一念頃能使數千萬億魔不知佛處，現人為魔所燒，隨世間習俗而入，示現如是。

「佛悉曉了十方不可計諸佛所有經法，示現人反覆問，隨世間習俗而入，示現如是。

「佛用哀十方故，出現世間欲教度，復現人供養得福無量，隨世間習俗而入，示現如是。

「佛無本，隨世間所喜色，現身如是本一，隨世間習俗而入，示現如是。

「合聚十方雷電之聲共作一聲，不能動佛一毛，現入禪三昧當於無聲處，隨世間習俗而入，示現如是。

「諸經法本無名，佛示人諸經法無央數，隨世間習俗而入，示現如是。

「佛想計本悉斷、常不離三昧，現人為說若干種經法，隨世間習俗而入，示現如是。

「佛前身所作，善惡不可前身得，會當後身得，佛示人自作自得，隨世間習俗而入，示現如是。

「佛知世間本無，人諸所有本無形，佛現度脫無央數人，隨世間習俗而入，示現如是。

「佛知諸經法本空，本亦無所有，現人有更死生，隨世間習俗而入，示現如是。

「本無今世後世之事，佛現人有今世後世之事，隨世間習俗而入，示現如是。

「五陰、六衰、四大合為一，本無有，佛示現人、欲界、色界、無思想界，隨世間習俗而入，示現如是。

「本無過去、當來、今現在人，佛現死生五道中人，隨世間習俗而入，示現如是。

「佛為悉示愚癡皆盡，現人本布施，隨世間習俗而入，示現如是。

「過去、當來、今現在經法，佛悉知其本，佛示人可說、有不可說，隨世間習俗而入，示現如是。

「佛知諸經本末一切皆深，佛分別各自說其事，隨世間習俗而入，示現如是。

「佛所語無有異說，四諦法隨人所解而說，隨世間習俗而入，示現如是。

「諸比丘僧難可敗壞，正使數千億萬魔來及諸惡，不能破壞比丘僧，佛現人破壞比丘僧，隨世間習俗而入，示現如是。

「經法本無從誰學，亦莫不學者，佛現人經法，是受戒、是不受戒，隨世間習俗而入，示現如是。

「空空亦無繫，亦無脫世間，佛示人度脫，隨世間習俗而入，示現如是。

「佛般泥洹無所向，阿羅漢般泥洹無所向，佛說法示人，隨世間習俗而入，示現如是。

「佛說無所生無所滅，是為要，亦無所得亦無所失，隨世間習俗而入，示現如是。

「佛說泥洹，譬如燈滅無形，但有字耳。經法無有能壞者，隨世間習俗而入，示現如是。

「佛悉知諸經法本無形，佛現人說經法甚眾多，隨世間習俗而入，示現如是。

「諸佛心皆無所罣礙，未嘗離三昧時，現人生念，隨世間習俗而入，示現如是。

「佛諸惡悉盡，但有諸功德具足，佛現人諸惡未盡，隨世間習俗而入，示現如是。

「佛身行、口言、心念當與智慧俱，是為本，佛現人使比丘說經，自復欲聞，隨世間習俗而入，示現如是。

「佛智慧所解無有竭底，過去、當來、今現在本空，佛現人說經法，隨其所喜各各為說，隨世間習俗而入，示現如是。

「諸佛合一身以經法為身，佛現為人說經法，隨世間習俗而入，示現如是。

「佛、辟支佛、阿羅漢、未得道人，現死生得泥洹，隨世間習俗而入，示現如是。

「佛現為羅漢說經法悉具足，雖知其具足，不及薩云若，隨世間習俗而入，示現如是。

「佛智慧無有能過者，悉知無有過去、當來、今現在，佛現所因緣說經法，隨世間習俗而入，示現如是。

「中有欲知佛及了佛法者，經本端界悉入，是人為曉了佛，隨世間習俗而入，示現如是。

「菩薩亦不入母腹中，亦不從母腹中出。何以故？經法本界無所不入。菩薩現人入母腹中，隨世間習俗而入，示現如是。

「無所從生法樂，諸經法亦無所從生，菩薩現人初生時，隨世間習俗而入，示現如是。

「菩薩母腹空定，含受一佛境界，菩薩各各現人因緣生，隨世間習俗而入，示現如是。

「佛化分身在無央數，不可復計佛剎悉遍至，佛身亦不增亦不減，隨世間習俗而入，示現如是。

「菩薩常現生無有絕時，常本無而住不勤苦，隨世間習俗而入，示現如是。

「佛智慧功德威神不可復計，佛現人限長短使人知之，隨世間習俗而入，示現如是。

「經法本界無有能過者，過去、當來、今現在皆空故。佛現人尊經法，隨世間習俗而入，示現如是。

「本無所生無所滅，經本界悉入，佛現人境界壞敗時，隨世間習俗而入，示現如是。

「經法本無所從生，無形而住，佛現經法，隨世間習俗而入，示現如是。

「觀本無，亦無所見、亦無所視，佛視人悉見悉了悉知，隨世間習俗而入，示現如是。

「諸經法無有作者，亦無所出生，佛現人經法本無所出生，隨世間習俗而入，示現如是。

「泥洹及空無有形聲，亦無有名，佛現四大及形聲，隨世間習俗而入，示現如是。

「佛力無有雙比，不可復計，亦無減盡時，現人衰老求人給使，隨世間習俗而入，示現如是。

「佛慈哀悉遍等，終無有厄難窮極時，佛現癡人不當與從事，隨世間習俗而入，示現如是。

「佛諸功德成就悉具足，佛現功德少所，隨世間習俗而入，示現如是。

「無所從生本，從中亦無所出生，佛現三門者，隨世間習俗而入，示現如是。

「佛現本末無所罣礙，功德福無有能過者，佛現人有施與者，不斯受趣足而已，示不貪，隨世間習俗而入，示現如是。

「人有至誠善意念佛者，佛即為現，佛亦無處所，佛現身行菩薩道者，隨世間習俗而入，示現如是。

「佛度脫不可復計阿僧祇人，為不度一人。何以故？本無故，隨世間習俗而入，示現如是。

「佛珍寶內藏經，人有聞者，無有不得安隱，度數千萬億劫無數，如是菩薩世所行，用十方人故。菩薩世行經戒，未曾有犯時，用是得佛智慧，有應是行得佛疾。菩薩行慈哀，有益十方無極，有作是行者，得佛疾。何人聞是不奉行？佛威神巍巍，其有聞經法，莫不過度。」

佛說經已，文殊師利菩薩及諸菩薩等，皆歡喜，前為佛作禮而去。

佛說內藏百寶經

[CBETA 贊助資訊](#)

[.\(http://www.cbeta.org/donation/index.php\)](http://www.cbeta.org/donation/index.php)

自 2001 年 2 月 1 日起，CBETA 帳務由「財團法人西蓮教育基金會」承辦，並成立「財團法人西蓮教育基金會」－ CBETA 專戶，所有捐款至 CBETA 專戶皆為專款專用，歡迎各界捐款贊助。

您的捐款本協會皆會開立收據，此收據可在年度中申報個人或企業的綜合所得稅減免。感恩諸位大德的善心善行，以及您為佛典電子化所做的一切貢獻。

信用卡線上捐款

本線上捐款與聯合信用卡中心合作，資料傳送採用 SSL (Secure Socket Layer) 傳輸加密，讓您能夠安全安心地進行線上捐款動作。

[前往捐款](#)

信用卡（單次 / 定期定額）捐款

本授權書可提供單次捐款或定期定額捐款之用途。

請於下載並填妥捐款授權書後，請傳真至 02-2383-0649，並請來電 02-2383-2182 確認。

或掛號寄至 10044 台灣台北市中正區延平南路 77 號 8 樓 R812 財團法人西蓮教育基金會收。

請在此下載 [授權書](#) (MS Word 格式)

劃撥捐款

郵政劃撥帳號：1 9 5 3 8 8 1 1

戶名：財團法人西蓮教育基金會

欲指定特殊用途者，請特別註明，我們會專款專用。

線上信用卡 / PayPal 捐款

PayPal 是一個跨國線上付款機制的公司，CBETA 引用其服務，提供網友能在線上使用信用卡或 PayPal 帳戶贊助 CBETA。

PayPal is an online system of a global payment solution. CBETA uses its service to provide the uses to donate by using the credit cards or PayPal account to support the CBETA project.

相關收據開立事宜，由於付款幣別為美元，我們除了會依您所贊助之美元金額開立收據外，另我們會依捐款當日公告匯率開立台幣收據，此收據為國內正式合法報稅憑證。

Since the donation made is in US currency, hence all the receipts will be issued in the US dollars consequently. However for the domestic donators, a Chinese official receipt will also be made according to the foreign exchange rate for the purpose of tax deduction.

[線上信用卡 / PayPal 贊助](#)

支票捐款

支票抬頭請填寫「財團法人西蓮教育基金會」。

CBETA is part of Seeland Educational projects, any donation (ex- cheques, remittance, etc.,) please entitle to "The Seeland Education Foundation".
